

BATASUNAREN LEGEZ KANPORATZEA. Auzitegi Goreneko Sala Bereziak Batasunaren legez kanporatzeari buruzko frogen azterketako bista publikoen lehen saioa egin zuen atzo. Hamahiru ertzainek deklaratu zuten lau ekitaldiri buruz.

Legez kanporatzeko oinarrien ahulezia agerian utzi dute lehenengo lekukotzek

Lau ekitaldiri buruzko xehetasunak eman zituzten hamahiru ertzainek Auzitegi Gorenean, Batasunak legea urratu duela adierazten duen argibide zehatzik eman gabe



MANUEL H. DE LEON / EFE

Auzitegi Goreneko Sala Berezia, 16 epailek osatuta, bildu zen frogen buruzko auzi jardunean.

Izen-abizenik eman behar izanik gabe eta ikusleek eta kazetariak ikusten ez zituztela –bionbo moduko bat jarri zuten tartean– erantzun zieten hiru parteetako ordezkarien galderari. Jose Maria Luzon Fiskaltza-aren izenean, Ramon Miñarrin Estatuko Abokatuaren izenean, eta Iñigo Iruin Batasunaren izenean –Adolfo Araiz ez zen izan–.

Auzitegi Goreneko areto nagusian egin zen bista, baina berrogeita hamar bat kazetariak betetzen zuten aldea salbu, aretoa erdi hutsik egon zen, doze-na bat ikuslerekkin.

Manifestazioko oihuak

Lehenengo bost lekukoek abuztuaren 11ko manifestazioari buruz deklaratu zuten. Estatuaren bi lege ordezkarien galderei erantzunez, manifestazioa Batasunak deitu zuela, pankarta eramaten besteak beste Arnaldo Otegi, Joseba Permach eta Joseba Alvarez joan zirela eta manifestazioan zer oihu egin ziren adierazi zuten.

Bi ertzainek –bata lekuko zuzena, bestea txostenaren egilea– aipatu zuten ETaren aldeko oihuak entzun zirela, baina Iruinen galderei erantzunez, pankartarekin zihoazen Batasuneko kideak ez zutela oihurik egin argitu zuten. Bostei galdetu zien Iruinek ea Batasuneko burukide, hautetsi, legebiltzar-kide, hautagai edo militanterik ezagutu zuten oihu horien egileen artean, eta guztiek ezetz erantzun zuten.

Joseba Alvarezrek manifestazio bukaeran egindako adierazpenak ez zituztela entzun erantzun zioten fiskalari guztiek, baina gertaeren txostenaren egileek bideoen eta prentsa erreferentzien bidez zer esan zuen jakin zuela esan zuen. Fiskalari erantzun zionez, «Aznarrek gerra nahi bazuen, Batasuna eta Euskal Herria aurrez aurre» izango zituela esan zuen Alvarezrek. Baina Iruinek euskaraz esan zuenari buruzko zehaztasunak eskatu zizkionean, Alvarezrek Batasunak «borroka» egingo zuela esan zuela zehaztu zuen, Aznarrek «guda» nahi bazuen.

Abuztuaren 15ean Donostiako udaletxearen aurrean ikurrinari egindako omenaldia bukatu eta gero Espainiako bandera bat erre zutenek omenaldiarekin zerikusia zutela adierazten duen daturik ez dagoela esan zuten gertaera honi buruz deklaratu zuten bi ertzainek.

BATASUNAREN ORDEZKARIA

Iruin: «Ertzainen lekukotzak, gure aldeko frogarik argienak»

Aztergai izan ziren lau gertaerei buruz ertzainek egindako txostenak eta emandako lekukotzak «Batasunaren defentsarako frogarik argienak» bihurtu direla esan zuen Iñigo Iruin Batasuneko abokatuak, atzoko bista bukatu ondoren. «Gaurko saioak nabarmen uzten du zer nolako axolagabekeriarekin jokatu zuten fiskaltzak eta estatuko abokatuak demandak jartzerakoan, seguruenik Gobernuak ilegalizazioa hauteskunde aurretik lortu ahal izateko emandako presaren eraginez». Iruinen hitzetan, «harritzekoa da nola nahi duten Batasuna horrelako frogekin legez kanpo utzi». Lau gertaerei buruz Fiskalak eta Estatuaren Abokatuak ilegalizazio eskaeratan egin dituzten aipamenak «guztiz deseginda» gelditu direla esan zuen Iruinek. «Balantzea, beraz, guztiz positiboa da, eta ikusi beharko da, gauzak horrela jarraitzen badute, Auzitegi Gorenak zer elementu dituen Gobernuak nahi duen ilegalizazioa aurrera eramateko», gehitu zuen.

Imanol Murua Uribe | MADRIL
Berriemaile berezia

Patxi Eskitxabel preso ohiari ongi etorrian «Batasunaren izenean» lore sorta bat eman ziotela, eta Lezoko Batasuneko alkateak manifestazio baimendu batean Amnistiaren Aldeko Batzordearen ikur «legez kanpo» ageri zuen pankarta eraman zuela. Hori baino askoz gehiago ez zuten frogatu Ministerio Fiskalaren eta Estatuaren Abokatuak ordezkariak atzo goizean Auzitegi Gorenean, Batasunaren legez kanporatzeko prozeduraren barruan egindako lehenengo bista publikoan.

Espainiako Gobernuak eta Estatuko Fiskaltzak egindako ilegalizazio eskaeratan oinarri gisa ageri direnetako lau gertaera izan zituzten, hain zuzen ere,

atzo aztergai: abuztuaren 11n Batasunak Faxismoari stop. Demokrazia euskal herriarentzat goiburuarrekin deitutako manifestazioa, abuztuaren 15ean ikurrinari Donostian egindako omenaldia, 17an Patxi Eskitxabel preso ohiari egindako ongi etorria, eta uztailaren 13an Lezonen estradizioen eta entregen aurka egindako manifestazioa.

Hamahiru ertzainek deklaratu zuten lau ekitaldi horien lekuko gisa –hamalau zeuden deituak, baina bat ez zen agertu erietxera eraman berri dutelako–, Auzitegi Goreneko Sala Berezia osatzen duten 16 magistratuen aurrean –haien artean Fernando Ledesma gobernu sozialista bateko Justizia ministro ohi eta Estatuko Kontseiluko buru ohi, jubilatuta berria den magistratu baten lekuan–.